



Rabu, 15 Januari 2025

Ogen: Jakobus 2:14



"Isi Pustaka Si Badia Teridah Arah



Melala kesaksin-kesaksin si ioge kita bas Pustaka Si Badia kerna perbahanen rikut pe ras keleng ate Dibata si mbelin; mulai kin Dibata nepa doni enda radu ras isina kerina seh ku mpepalem kalak sakit, mpegeluh kalak si mate bage pe mpelawes setan i bas sekalak si kesurupen. Artina maka arah kita ngoge Pustaka Si Badia si eteh perbahanen Dibata Si Mbelin dengen erkuasa.

Wari enda erlajar kita maka isi Pustaka Si Badia e teridah min arah perbahanenta. Kita selaku kalak si erkiniteken man Tuhan arus encidahken keleng ate Dibata e arah kita pe banci engkelengi temanta manusia. Dibata engkelengi kita alu mereken anakNa si tonggal gelah geluhta datken keterkelinen; sie enda nuduhkan maka keleng ate Tuhan e la ersibar. Patutlah kita ngusih perbahanen Tuhan i bas engkelengi teman manusia. Sada hal si mungkin banci siinget i bas kita ncidahkan isi Pustaka Si Badia (keleng ate), asum terjadi banjir bandang i daerah Cingkam; kerina kita kepate, kerina kita ikut muat bagin lako nampati dengen notoken keluarga si kena bencana, kerina kita mpenahangi baban si mberat sinialaken teman-temanta alu nehken sembako bage pe baju bekas, tentuna melala denga nge contoh-contoh si deban i bas kita ncidahkan isi Pustaka Si Badia arah perbahanen. Hal si deban si pelajari kita e me Dibata ngalemi kesalahen-kesalahen si ibahan manusia; gelahna la terjeng i oge ngenca emaka kita pe arus nggit ngalemi kesalahen si ibahan temanta nandangi dirinta. "Isi Pustaka Si Badia teridah arah perbahanen" eme tema paksa tenengta wari enda; tentuna arah tema enda iajuk kita guna encidahken isi Pustaka Si Badia gelah arah kegeluhenta rikut pe ras perbahanenta i angka kalak kerna keleng ate ras kuasa Tuhan. Pengajuk man banta kerina, maka Pustaka Si Badia la terjeng ioge, ihafal kerina ayat-ayatna tapi terlebih-lebih maka sicidahken arah perbahanenta.